

Statuts

dalla Secziun da catschadurs Péz Alpetta Disentis/Mustér



commembra dall'Associazion cantunala grischuna dils catschadurs da patenta (BKPJV Bündner Kantonaler Patentjäger-Verband) e commembra dil district 1 Cadi dall'Associazion cantunala grischuna dils catschadurs da patenta.

I. Num, domicil ed intent

Num Art. 1

¹ Sebasond sin igl art. 60 ff. dil Cudisch civil svizzer ei vegniu fundau sut il num "Muraun" igl onn 1926 a Disentis/Mustér ina secziun da catschadurs. A caschun dalla radunonza extraordinaria dils 28 d'uost 1977 ei il num oriund vegnius midaus en "Secziun da catschadurs Péz Alpetta".

² Il domicil dalla Secziun da catschadurs Péz Alpetta ei Disentis/Mustér. La secziun appartegn all'Associazion cantunala grischuna dils catschadurs da patenta (BKPJV) ed al district 1 da quella.

Egualitad dallas schlattinas Art. 2

¹ Las indicaziuns davart las personas e lur funcziuns els statuts dalla Secziun da catschadurs Péz Alpetta serefereschon da principi ad omisduas schlattinas, aschilunsch ch'ei seresulta buca enzatgei auter ord il senn dils statuts.

Intent Art. 3

¹ La Secziun da catschadurs Péz Alpetta ha la finamira da tgjar ils interess dils catschadurs. Ella tgira e promova in bien spért entras:

- mantener la basa per ina sauna catscha da patenta en nies cantun
- haver bien quitau per la fauna e flora, e quei en special cun defender e proteger il spazi vital per nossas selvaschinas
- exequir ina catscha commensurada al spazi da viver
- esser commembra dil BKPJV e dil district 1 cun renconuscher lur statuts e reglaments
- perseguir e sefatschentar cun fatgs da catscha, s'engaschar all'elaboraziun e midadas da leschas e regulativs da catscha dad ina vart e dad ulteriuras leschas che pertuccan fauna e flora da l'autra vart.

II. Commembradi

Commembradi Art. 4

¹ La Secziun da catschadurs Péz Alpetta secumpona da:

a) commembers A

Commembers A possedan il dretg da vuschar en fatgs dalla secziun, dil BKPJV e dalla JSRS. Els ein obligai da pagar las contribuziuns alla secziun. Commembers A sa mintga persona daventar che posseda il dretg d'exequir la catscha el cantun Grischun. Leutier s'auda era la surveglianza da catscha dil cantun Grischun.

b) commembers B

Commembers B ein quels che figureschan gia en in'autra secziun sco commember A. En fatgs interns dalla Secziun da catschadurs Péz Alpetta ein els legitimai da votar ed obligai a tuttas contribuziuns tenor art. 17. Sco commembers B han els buca il dretg da vuschar e san buca vegnir elegi en caussas dil BKPJV e dalla JSRS.

c) commembers passivs ni fautors

La Secziun da catschadurs Péz Alpetta sa recepir personas che han buca il dretg dad ir a catscha sco commembers passivs ni fautors. Tals commembers han buca il dretg da vuschar e da vegnir elegi en funcziuns dalla secziun, dil BKPJV e dalla JSRS. Lur dretgs ed obligaziuns ein reglai en reglaments dil BKPJV, denter auter el reglament da tir. Els han la pusseivladad dad abbonar la gasetta dil BKPJV ("Catschadur Grischun").

d) candidats per la patenta da catscha

La Secziun da catschadurs Péz Alpetta sa recepir personas (candidats) ch'ei s'annunziadas pigl examen da catscha el cantun Grischun. Ellas han buca il dretg da votar e da vegnir eligidas. Pils candidats paga la secziun negina contribuziun al BKPJV. Il mument ch'els acquistan la patenta da catscha ein els automaticamein commembers A. Ils candidats ein deliberai dalla contribuziun annuala.

² La Secziun da catschadurs Péz Alpetta meina ina gliesta da tut ils commembers.

³ La pusseivladad da daventar commember dalla Secziun da catschadurs Péz Alpetta ei dada a mintgin che gauda las honors ed ils dretgs civils e che cumplenescha il 18avel onn da naschienscha. Commembers A ni commembers B san mo personas daventar che possedan il dretg d'exequir la catscha grischuna.

Recepsziun da commembers Art. 5

¹ La damonda per daventar commember dalla Secziun da catschadurs Péz Alpetta ei da tschentar a scret per mauns dalla suprastonza. Sur dalla recepsziun definitiva decida la radunonza generala. A quella han ils candidats d'esser presents. Ina recepsziun sa vegnir refusada, sch'ina conduita donnegionta enviars la secziun, il BKPJV ni il district 1 semuossa.

² Encunter in'eventuala refusada dil commembradi A sa vegnir fatg recuors a scret enteifer 30 dis tier la suprastonza centrala dil BKPJV. Quel decida lu definitivamein la caussa.

³ Cun la recepsziun alla Secziun da catschadurs Péz Alpetta sesuttametta il niev commember automaticamein allas obligaziuns sco era als dretgs dils statuts avon maun.

Extrada da commembers Art. 6

¹ Il giavisch d'extrar ord la Secziun da catschadurs Péz Alpetta ei da comunicar a scret alla suprastonza entochen alla fin da december digl onn current.

² Entras l'extrada crodan tuts dretgs e tuttas obligaziuns enviars la Secziun da catschadurs Péz Alpetta. Il pagament dalla contribuziun annuala per igl onn current resta aunc obligonts.

Exclusiun da commembers Art. 7

¹ Scadin commember dalla Secziun da catschadurs Péz Alpetta che

- cunterfa als interess dalla secziun
- ademplescha buca las obligaziuns statutaras
- piarda il dretg dad ir a catscha
- vegn truaus pervia da surpassaments pesonts encunter il dretg da catscha

sa vegnir sclaus a caschun dalla radunonza generala ord quella, sche 2/3 dils commembers presents ein persunter. Motivaziuns per in'exclusiun dad in commember san vegnir inoltradas da scadin commember A a scret alla suprastonza entochen 10 dis avon la radunonza generala.

Commembers d'honor Art. 8

¹ Commembers A che han gronds merets per la Secziun da catschadurs Péz Alpetta san vegnir nominai sco commembers d'honor. La nominaziun sco commember d'honor vegn fatga entras la radunonza generala.

² Gronds merets acquista enzatgei, sche sia prestaziun per la caussa dalla secziun, dil BKPJV ni dil district 1 ei extraordinaria.

³ Commembers d'honor ein dispensai dalla contribuziun da commembradi tenor art. 17 al. 1 lit. a, gaudan denton tut ils dretgs da commember.

⁴ Commembers d'honor dalla Secziun da catschadurs Péz Alpetta san vegnir proponi per la distincziun da meret dil BKPJV. Las cundiziuns per daventar commember d'honor dil BKPJV ein descrettas els statuts corripundents.

Commembers veterans e libers Art. 9

a) commembers veterans

¹ Commembers A che cumpleneschan el decuors digl onn current il 60avel onn da naschienscha e fan part nuninterruttamein dapli che 25 onns alla secziun daventan commembers veterans. Els survegnan l'enzenna da veteran dil BKPJV, ein denton obligai da pagar las contribuziuns statutaras tenor art. 17.

b) commembers libers

¹ Commembers A che cumpleneschan el decuors digl onn current il 75avel onn da naschienscha e che fan part d'ina secziun dil BKPJV nuninterruttamein dapli che 25 onns daventan commembers libers. Els ein dispensai dalla contribuziun da commembradi tenor art. 17 al. 1 lit. a e b, gaudan denton tut ils dretgs da commember A ed obtegnan l'enzenna da veteran BKPJV, aschilunsch ch'els possedan aunc buca tala.

² Cun resalva dad art. 7 al. 1 ha in'exclusiun limitada da catscha entras surpassament encunter il dretg da catscha negina interrupziun dil commembradi dalla secziun per consequenza.

Commembers defuncts Art. 10

A commembers defuncts (commembers A) separticipescha ina delegaziun dalla secziun alla sepultura cun in davos salid (tschupi ni donaziun).

III. Organisations

Organs **Art. 11**

¹ Ils organs dalla Secziun da catschadurs Péz Alpetta secloman:

- a) la radunonza generala
- b) la radunonza da tgira
- c) la suprastonza
- d) ils revisurs da quen

Radunonzas **Art. 12**

A) en general

¹ La Secziun da catschadurs Péz Alpetta salva annualmeins duas radunonzas. L'invitaziun allas radunonzas ha da succeder silmeins diesch dis avon il termin fixau. La gliesta dallas tractandas che vegnan deliberadas vegn aschuntada ni publicada commensuradamein (p.ex. el Fegl official dalla Surselva ni sin la pagina d'internet).

² Propostas per mauns dallas radunonzas ein d'inoltrar a scret alla suprastonza sil pli tard otg dis avon il termin fixau.

³ Propostas che seresultan ord il decuors dallas radunonzas, che figureschan denton buca sin la gliesta da tractandas, san vegnir protocolladas e deliberadas a caschun d'ina dallas proximas radunonzas.

⁴ Elecziuns e votaziuns succedan per regla cun maun pli, nun ch'ei vegni pretendiu scrutini. Ina fatschenta ni elecziun ei acceptada, sch'il diember dallas vuschs affirmativas survarga la mesadad dallas vuschs valeivlas. Tier egualitad da vuschs dat il president la decisiun e quei senza risguardar sia vusch gia dada giu. Ils conlus ein ligionts per scadin commember dalla secziun.

B) radunonza generala

¹ La radunonza generala ha liug el decuors dil schaner / fevrer. Ella deliberescha suandontas fatschentas:

1. beinvegni ed appel
2. elecziun da dus dumbravuschs
3. approvaziun dalla gliesta da tractandas
4. prelecziun ed approvaziun dil protocol
5. rapport dil president
6. rendaquen dil cassier (incl. menaschi center da tir a Sars sut), rapport dils revisurs ed approvaziun dil quen annual
7. a) fixaziun dil regulativ da taxas e da contribuziuns
b) preventiv
8. elecziuns da commembers da suprastonza ed ulteriurs funcziunaris
9. elecziuns dils delegai allas radunonzas districtualas e cantunalas
10. orientaziun ed approvaziun dil program da lavur
11. a) rapport dallas cumissiuns
b) discussiun davart eventualas midadas dallas prescripziuns dil menaschi da catscha
12. honoraziuns
13. recepciun da commembers novs ed abdicaziuns
14. varia

C) radunonza da tgira

¹ La radunonza da tgira ha liug a temps avon la radunonza da delegai dil BKPJV. Ella deliberescha suandontas fatschentas:

1. beinvegni ed appel
2. elecziun da dus dumbravuschs
3. approvaziun dalla gliesta da tractandas
4. prelecziun ed approvaziun dil protocol
5. rapport dil cau da tgira
6. a) rendaquen dil cau da tgira, rapport dils revisurs ed approvaziun dil quen da tgira
b) preventiv
7. program da lavur
8. discussiun davart eventualas midadas dallas prescripziuns dil menaschi da catscha
9. varia

D) radunonzas extraordinarias

¹ Radunonzas extraordinarias san vegnir convocadas:

- a) entras conlus dalla suprastonza
- b) sin giavisch da silmeins diesch commembers A

Suprastonza **Art. 13**

¹ La suprastonza dalla Secziun da catschadurs Péz Alpetta secumpona da tschun commembers:

- a) president
- b) actuar / vicepresident
- c) cassier
- d) cau da tgira
- e) cau da material e responsabel per il center da tir a Sars sut

² Sco ulteriurs funcziunaris ageschan

- a) dus revisurs da quen
- b) responsabel per la pagina d'internet (webmaster)
- c) substitut dil cau da tgira
- d) caus starliera

² Ils suprastonts ed ils ulteriurs funcziunaris vegnan elegi per ina perioda d'uffeci da dus onns. Las elecziuns succedan alternontamein.

- els onns pèr vegnan elegi: president, cassier, cau da tgira, in revisur da quen, caus starliera
- els onns dusp vegnan elegi: actuar, cau da material e responsabel per il center da tir a Sars sut, in revisur da quen, responsabel per la pagina d'internet (webmaster) ed il substitut di cau da tgira

³ Ils commembers da suprastonza ein obligai da substituir in l'auter, sch'ei fa basegns.

Duers e dretgs dalla suprastonza **Art. 14**

¹ La suprastonza liquidescha las fatschentas currentas dalla Secziun da catschadurs Péz Alpetta. Ella meina la secziun e representa tala internamein ed anovians. Documents cun valor giuridica ston vegnir signai entras il president ed in ulterior consuprastont.

² La suprastonza seraduna sin invitaziun dil president ni sin damonda dad in consuprastont aschi savens sco necessari. Ella liquidescha tuttas fatschentas a temps ed el senn dalla secziun. Ella ha dad instradar immediat las mesiras necessarias, sche las ordinaziuns dils statuts vegnan sbittadas.

³ La suprastonza ha da dar plaid e fatg da tut temps enviars ils revisurs da quen ni la radunonza generala.

⁴ Per contonscher las finamiras dalla Secziun da catschadurs Péz Alpetta ha la suprastonza d'interpreter tut il pusseivel. Per quei intent ha ella da contactar a temps ed en maniera correspudenta las autoritads ed ils cercchels interessai.

⁵ La suprastonza sa installar cumissiuns cussegliuntas per il studi davart damondas particularas, denter auter per la planisaziun da catscha.

Revisurs **Art. 15**

¹ Ils revisurs han l'incumbensa da controllar il menaschi da finanzas dalla Secziun da catschadurs Péz Alpetta, inclusiv la cassa da tgira, annualmeins e da dar rapport surlunder per mauns dalla radunonza generala. Als revisurs stat tutta documentaziun correspudenta leutier a disposiziun. Els vegnan clamai a temps entras il cassier dalla secziun per la revisiun.

IV. Finanzas

Responsabladad, onn da fatschenta **Art. 16**

¹ Per las obligaziuns garanteschas exclusivamein la facultad dalla Secziun da catschadurs Péz Alpetta. Tutta responsabladad persunala davart la suprastonza e dils commembers dalla secziun ei sclausa. In'obligaziun da pagamenti supplementars che survarga la contribuziun annuala dil singul commember ei expressivamein sclausa.

² Igl onn da fatschenta cuoz mintgamai digl 1. da schaner entochen ils 31 da december.

Contribuziuns **Art. 17**

¹ Las contribuziuns annualas statutaras dalla Secziun da catschadurs Péz Alpetta cumpeglian:

- a) contribuziuns da commembradi alla secziun
- b) contribuziuns da commembradi al BKPJV
- c) cumpart da cuosts alla gasetta dil BKPJV ("Catschadur Grischun")
- d) cumpart da cuosts ord la participaziun al center da tir a Sars sut
- e) contribuziuns da commembers passivs e fauturs
- f) tscheins da facultad
- g) gudogn ord tirs ed autras occurrenz

² L'altezia da scadina taxa e contribuziun vegn fixada en in regulativ separau che vegn approbaus annualmeins a caschun dalla radunonza generala.

³ La contribuziun annuala per commembers A, commembers B e commembers passivs munta silmeins a frs. 10.00.

Facultad**Art. 18**

¹ La facultad dalla Secziun da catschadurs Péz Alpetta astga vegnir impundida spìrontamein per ils intents dalla secziun.

² Per l'ademplida dils pensums tenor art. 3 dils statuts sa la suprazonza far annualmein expensas unicas tochen frs. 2'000.00.

V. Determinaziuns generalas ed ordinaziuns finalas**Center da tir a Sars sut****Art. 19**

¹ Pertucont il center da tir a Sars sut exista in contract denter la Societad da tir Desertina e la vischnaunca da Disentis/Mustér impurtaus el cudisch funsil. Il diever e las obligaziuns per il center da tir a Sars sut per las uniuns cumpigliadas ein regladas en il "Reglament da gudida center da tir a Sars sut, Disentis/Mustér".

Existenza dalla secziun**Art. 20**

¹ La Secziun da catschadurs Péz Alpetta sa vegnir sligiada a caschun dalla radunonza generala. Quei succeda tier in surpli da 3/4 dallas vuschs dils commembers A presents ni sut la cundiziun ch'il diember da commembers A ei sereducius sin 5 ni pli paucs commembers.

² Ina fusiun cun in'autra secziun da medem intent sa vegnir decidida tier in surpli 2/3 dallas vuschs dils commembers A presents alla radunonza generala.

³ Tier ina sligiaziun dalla Secziun da catschadurs Péz Alpetta sto la cassa e la facultad vegnir deponida - suenter haver adempliu tuttas obligaziuns - per administraziun tier la suprazonza dil BKPJV, tochen che la secziun vegn fundada danovamein.

⁴ Pertucont la participaziun dalla Secziun da catschadurs Péz Alpetta vid il center da tir a Sars sut vala art. 19. Il possess dalla Secziun da catschadurs Péz Alpetta cul material ed inventari vegn surschaus per administraziun allas instanzas ufficalas dalla vischnaunca da Disentis/Mustér.

Statuts**Art. 21**

¹ Propostas per la revisiun dils statuts ston vegnir annunziadas a temps sco tractanda per mauns dalla radunonza generala e figuradas sin la gliesta da tractandas. Il conlus per la revisiun dils statuts basegna in surpli da vuschs da 2/3 dils votants presents.

Cass d'interpretaziun e dispetas**Art. 22**

¹ En cass da svaris pertucont interpretaziun dils statuts decida la radunonza generala.

² Tier dispetas che tangheschan ils interess dalla Secziun da catschadurs Péz Alpetta e lur intschess, sco era tier dispetas denter commembers e tiazas persunas che pertuccan la secziun sesprova la suprazonza da pacificar sco emprema instanza.

VI. Entrada en vigur

L'approbaziun dils statuts presents ei succedida a caschun dalla radunonza dalla Secziun da catschadurs Péz Alpetta ils 11 d'avrel 2014. La vigur legala succeda immediat tier l'approbaziun entras il comite central dil BKPJV.

Ils statuts presents remplazzan ils statuts dils 22 da november 2006 (approbaziun entras la suprazonza dil BKPJV), sco era tuttas notizias ni midadas da statuts fatgas en protocols ni en ulteriurs documents.

per la Secziun da catschadurs Péz Alpetta, ils 11 d'avrel 2014

il president

igl actuar

Hubertus Jacomet

Victor Flepp

per l'approbaziun dalla suprazonza centrala dil BKPJV, ils 8 da matg 2014

il president

igl actuar

Bear Angerer

Hannes Papan